

riofius. II. Decuit Dei filium concipi non humano semine, sed Spiritu Sancto operante: ergo ita factum est. Antecedens est doctrina S. Maximi serm. 3. de nativitate Domini, authoris Operis imperfecti homin. 1. in Mattheum, Damasceni lib. 3. cap. 2. docentium, Spiritum Sanctum in Conceptione Christi loco seminis fuisse; quod intelligendum est secundum vim effectivam seminis, quæ per Spiritum Sanctum suppleri potest, non vero secundum rationem causæ materialis. Consequentia sequitur ex paritate primæ rationis jam factæ. III. Est ratio Authoris Operis imperfecti hom. 1. in Matth., quæ sub hisce verbis a Suarez adducitur: Neque enim dignum erat, ut Unigenitus Dei, non propter se, sed propter hominem nascens, more nasceretur humano, homo enim in carne nascitur, ut corruptioni subiacet, Christus autem natus est, ut sanet corruptionem. Sicut ergo non est consequens, ut corruptibilis homo ex incorruptibilitate virginis nascatur, sic non erat consequens, ut filius Dei, qui ideo nascatur, ut corruptibilitatem sanaret, ex corruptione conjugii nasceretur. IV. Est Cyrilli Hierosolymitani catechesi 12. prope finem, & Damasceni lib. 4. cap. 15. dicentium, quia decuit, ut sicut mulier ex solo viro facta erat, ita vir aliquis ex sola muliere procrearetur. Alias rationes proponit S. Thomas 3. par. qu. 31. art. 4. quas legendas remittimus apud eundem.

Dicimus II. B. Virginem filium pariendo, Virginitatem non amisisse; seu Christum Dominum, illæsa sua virginitate, peperisse; vel, quod idem est, virginem in partu fuisse.

I. Probatur ex Scripturis. Psalm. 21. Tu es, qui extraxisti me de ventre; quibus verbis significatur, Christum exisse de utero Virginis mirabili modo, & divina virtute, sicut ait Cyrillus Hierosolymitanus catechesi 12., sed hoc idem est ac exisse de utero, illæsa matris Virginitate: ergo &c. Unde Augustinus Epist. 120. cap. 12. Quid est, tu es, qui extraxisti me de ventre, si ad ipsum Jesum de Virgine procreatum refertur? An inde significare voluit partum Virginis, servata virginitate mirabili? Ut cum Deus fecisse dicitur, quod illic mirabiliter factum est nemini incredibile videatur. Isaia 7. Et Matthæi 18. Ecce Virgo concipiet, & pariet: Ecce Virgo in utero habebit, & pariet.

II. Probatur ex Romanis Pontificibus. Agapetus Papa epist. ad Antimum, si genuinæ sunt epistolæ Romanorum Pontifi-

cum usque ad Siricium: Sine Verbi potentia nec conciperet Virgo, nec pareret, & sine veritate carnis, obvoluta panis infantia, non jaceret. Hormisdas epist. 76. Proprium est Dei Filii, ut in novissimis temporibus Verbum caro fieret, & habitaret in nobis: ita intra viscera Sanctæ Mariæ Virginis genitricis Dei, unitis utrisque, sine aliqua confusione, naturis, ut qui ante tempora erat Filius Dei, fieret filius hominis, & nasceretur ex tempore, hominis more, matris vulvam natus non aperiens, & virginitatem matris, Deitatis virtute non solvens. Dignum plane, Deo nascente, mysterium, ut servaret partum sine corruptione, qui conceptum fecit esse sine semine, servans quod ex Patre erat, & representans quod ex Matre suscepit. Eadem docet in Epist. 1. ad Justinianum Augustum cap. 3., quemadmodum Leo Magnus epist. 10. cap. 21. & serm. 4. & 5. de Nativitate.

III. Probatur ex Conciliis. Concilium Chalcedonenfe in alloquutione ad Martinum Imperatorem: Deus Patres excitavit velut luminaria in errore degentibus, qui fidei intelligentiam omnibus exposuerunt, & Incarnationis beneficium accurate predicaverunt: quemadmodum ab initio illius ex utero perfectum sit mysterium. Quomodo sit Dei Genitrix, propter eum, qui virginitatem ipsam post conceptum largitus est, atque ut Deo dignum erat, uterum obsecuravit. Hoc idem asserunt Concilia Toletana I., VI., & XI.

IV. Probatur ex Patribus Græcis Gregorius Nyssenus orat. de Natali Domini: Puer panis involutus, & in præsepe requiescens: & illa post partum Virgo incorrupta mater fovet filium. Et orat. de occurso: Solus ipse inexplicabili modo conceptus, & inaffabiliter natus, haud ante patefactam nuptus virginalem aperuit vulvam, virginitatis signacula inviolata servans; etiam post admirabilem processionem. Cyrillus Hierosolymitanus catechesi 124.: Nascebatur, ut Virgines faceret. Multo ergo magis debuit virginum conservare corpus. Nazianzenus orat. 38. de Nativitate: Christus ex Virgine, Mulieres virginitatem colite, ut matres esse possitis. Et infra post medium: Et procreationem honore affici, & virginitatem præferri oportebat. Chrysostomus hom. 49. in Genesim: Quando tibi dicit Judæus: quomodo peperit Virgo? Dic ei: quomodo peperit sterilis, & vetula? Duo impedimenta tunc erant, & ætas intempestriva, & natura vitata: in Virgine autem unum impedimentum fuit, quod non esset particeps concubitus. Sterilitas igitur
jam